

Chè fanmi:

Yo pral bay tout elèv Egzamen anyèl ELA ak Matematik Eta Nouyòk pou klas 3yèm rive 8yèm ane pita nan sezon prentan sa a. Lwa Federal tout Elèv reyisi (Every Student Succeeds Act, ESSA) egzije egzamen sa yo epi yo fèt pou bay enfòmasyon enpòtan sou si elèv yo prepare pou pwogrese nan lekòl la ak gradye avèk panse kritik, rezoud pwoblèm, ak ladrès rezonman yo bezwen pou siksès alontèm nan lekòl, kolèj, ak karyè, epi pou sipòte elèv yo nan chèche sekirite ekonomik yo ak yon lavi ki ranpli chwa.

Egzamen sa yo se sèlman youn nan plizyè mezi lekòl nou yo itilize pou evalye pwogrès elèv yo: nòt, kanè, echantiyon redaksyon, pwojè, devwa, ak lòt travay elèv ki baze sou pèfòmans yo enpòtan tou.

Si w gen lòt kesyon, tanpri kontakte lekòl pitit ou a.

Kilè y ap fè egzamen Eta a pou klas 3yèm-8yèm ane?

Ane sa a, yo pral bay tès ELA ak Matematik an de sesyon nan de jou youn apre lòt.

KONPOZISYON ANGLE (ELA): 19-20 avril	Matematik: 2 me rive -3 me
Egzamen ratrapaj ELA: 24-28 avril	Make-up Math: 4 me rive -11 me

Ki jan tès eta yo benefisye pitit mwen an?

Oumenm ak pitit ou a benefisye tès Eta a paske yo:

- Bay enfòmasyon detaye sou si pitit ou a ap aprann sa yo atann li aprann pou nivo klas li.
- Ede lekòl yo detèmine kòman elèv yo ap pwogrese ak pèfòme nan konparezon avèk kamarad yo, epi ki elèv oswa pwofesè ki ka bezwen plis sipò.
- Pèmèt ou aprann kòman lekòl pitit ou a ap mache konpare ak lòt lekòl yo.

Kisa tès yo gen ladan yo? Konbyen tan pitit mwen an gen pou ranpli yon egzamen leta?

Chak tès gen de sesyon ki pa kwonometre epi yo fè yo nan de jou (yon sesyon pou chak jou). Sesyon 1 ak 2 pou ELA gen ladan kesyon chwa miltip ak kesyon ouvè. Sesyon 1 pou Matematik se chwa miltip sèlman. Sesyon 2 pou Matematik la gen ladan kesyon chwa miltip ak kesyon ouvè. Tès leta yo pa kwonometre. Elèv ki bezwen plis tan ap ka travay nan pwòp vitès yo pou pi byen demontre sa yo konnen ak sa yo ka fè.

Ki enpak rezilta nòt yo genyen sou pwofesè yo?

Dapre kritè seleksyon Mezi Aprantisaj Elèv yo chak lekòl yo, rezilta tès eta yo ka gen enpak sou evalyasyon pwofesè yo oswa yo ka pa gen enpak.

Ki wòl tès sa yo jwe nan admisyon lekòl presegondè oswa segondè? Kèk lekòl presegondè ak segondè itilize nòt egzamen Eta a avan kòm youn nan plizyè kritè pou admisyon. Yo pa janm itilize rezilta egzamen yo kòm sèl oswa prensipal mezi pou chanje klas oswa pou pran desizyon sou admisyon. Pou admisyon otòn 2023, kèk lekòl presegondè ak segondè te itilize nòt kou ak/oswa evalyasyon nan lekòl la pou evalye elèv yo. Pou jwenn plis enfòmasyon sou si y ap itilize nòt egzamen yo alavni pou admisyon, ale sou sitwèb¹ nou an an otòn lan.

¹ schools.nyc.gov/Middle ak schools.nyc.gov/High

Èske fanmi yo ka chwazi pou pitit yo pa patisipe nan egzamen Eta a, oswa èske yo ka mande pou yo pran yon lòt egzamen?

- Nou ankouraje tout elèv pou yo pran tès sa yo paske ni oumenm ni pitit ou a benefisye nan enfòmasyon nou jwenn nan rezilta tès yo. Egzamen Eta a bay lòt enfòmasyon sou sa pitit ou a ap aprann epi ede pwofesè yo ak lekòl yo ajiste sipò kote yo bezwen.
- Si w enterese pou pitit ou a pa pran egzamen Eta yo, tanpri konsidere pale avèk direktè lekòl pitit ou a. Si, apre w fin pale avèk direktè lekòl la, ou toujou vle refize pitit ou a pran egzamen yo, direktè lekòl la ap respekte desizyon w lan. Paran an ak direktè lekòl la dwe kenbe yon dosye konvèsasyon sa aalekri .

Kisa pitit mwen ta dwe fè pou prepare tès la?

- Ede pitit ou a dòmi byen nuit avan egzamen an epi pran yon bon manje maten nan maten an.
- Rekonèt santiman pitit ou a konsènan tès la epi ranfòse konfyans li.

Kilè m ap konnen kòman pitit mwen an te fè tès yo?

- Anjeneral Eta Nouyòk pibliye nòt egzamen yo pandan ete a epi nòt yo ap disponib atravè Kont Lekòl Vil Nouyòk pitit ou a.
- Nou ankouraje w pou kontakte pwofesè oswa direktè lekòl pitit ou a pou chita pale sou nòt egzamen Eta a ak pwogrè akademik jeneral.

Kisa k ap pase si pitit mwen an pa lekòl lè yo fè egzamen Eta a?

Li enpòtan pou pitit ou a pran tès la. Tanpri fè tout sa ou kapab pou sipòte pitit ou a epi asire w li nan lekòl lan jou egzamen yo. Elèv ki absan pou nenpòt rezon ap gen yon dezyèm chans pou pran tès la pandan peryòd ratrapaj la. Si pitit ou a absan tou pandan peryòd ratrapaj la, p ap gen lòt chans pou l pran tès la. Yo p ap penalize elèv yo oswa kenbe yo nan menm klas la sèlman poutèt yo pa pran yon egzamen Eta a.

Èske pitit mwen an dwe pran egzamen Eta a si l ap pran yon egzamen Regents tou?

Kèk elèv pran egzamen Regents nivo lekòl segondè nan lekòl presegondè. Si pitit ou a nan klas 8yèm ane epi li pral pran yon egzamen Regents Matematik ane lekòl sa a, lekòl ou a pa pral ba li egzamen Matematik klas 8yèm ane eta a. Ou ka chwazi pou pitit ou a pran egzamen Matematik klas 8yèm ane a pou w gen plis enfòmasyon sou pwogrè l, menmsi li pa obligatwa. Kontakte lekòl ou a si w ta renmen pou elèv ou a pran egzamen Matematik klas 8yèm ane a anplis yon egzamen Matematik Regents.